

ՀՈԴԿԱԾՆԵՐ ԵՎ ՀԱՂՈՐԴՈՒՄՆԵՐ СТАТЬИ И СООБЩЕНИЯ

ՄԻ ՎԱՐԿԱԾԻ ՎԵՐԱՊՐՈՒԿ ԵՎ ԳՐԵՐԻ ԳՅՈՒՏԻ ԹՎԱԿԱՆԸ

Բանասիր. գիտ. դոկտոր Ա. Ա. ՄԱՐՏԻՐՈՍՅԱՆ

Մաշտոցը գնում է «Արամի կողմերը» Վնամշապուհի հինգերորդ տարում՝ «ի հինգերորդ ամի Վնամշապուհի արքային Հայոց»։ Այնտեղ հանդիպում է Ծղեսիայի Բարիլաս և Ամիդի Ակակիոս եպիսկոպոսներին և նորագյուտ այրուքենով վերադառնում Վնամշապուհի վեցերորդ տարում՝ «ի վեցերորդ ամի Վնամշապուհի արքային Հայոց Մեծաց»։ Այդպես է ներկայացնում Կորյունը։ Իսկ գրքի վերջում նա բերում է ժամանակագրական համադրումներ, ուր ուղղակի ասված է. «Ծւ ի դպրութենէն Հայոց մինչև ցվախճան սրբոյն ամբ երեսուն և հինգ»։ «Ծւ դպրութեանն Հայոց յովերորդ ամէ Յազկերտի առեալ սկիզբն»¹։

Բանասերները գյուտի տարեթիվը որոշում են այս տվյալներով, և ժամանակագրական պարագիծը մեծ չէ՝ 402-ից 408, V դարի առաջին տասնամյակ։ Ադոնցը դուրս է գալիս այդ շրջանակից, նա գյուտը տեղադրում է 383—392 թթ. միջև։

Ադոնցը գտնում է, որ Մաշտոցը չէր կարող V դարի առաջին տասնամյակին հանդիպել Ծղեսիայի Բարիլաս եպիսկոպոսին, քանի որ այդ շրջանում Բարիլաս եպիսկոպոս չի հիշվում։ Կա Ռաբուլաս, որ եպիսկոպոսական աթոռ է բարձրացել 412 թ., իսկ Ակակիոսը Ամիդի եպիսկոպոս է կարգվել 420 թ.։

«Ծթե Մաշթոց Ամիդում ներկայացել է Ակակին և Ծղեսիայում՝ Ռաբուլին, այդ կարող էր լինել 420-ից ոչ առաջ և ոչ ուշ քան 435,— գրում է Ադոնցը.— Ծվ եթե իրավ այդ ճանապարհորդության հետ է կապված տառերի գյուտը, ակնհեր է, որ նա չէր կարող տեղի ունենալ Հազկերտի ութերորդ տարին— ժամանակական անհեթեթություն»²։

Ծվ Ադոնցը այդ ճանապարհորդության հետ չի կապում։ Նա գտնում է Մաշտոցին բարեկամ ուրիշ եպիսկոպոս՝ Թեոդոր Մոպսուեստացի և գրերի գյուտը փոխադրում է առաջ։

Ն. Ադոնցին միանում է Հ. Մանանդյանը. «Ադոնցի դիտողությունները, անշուշտ, խիստ հետաքրքրական են և արժանի են հատուկ ուշադրության»³,— գրում է նա և ընդունում, որ մաշտոցյան գիրը եղել է իրոք Թեոդոր Մոպսուեստացու քահանայության ժամանակ։ Մանանդյանը գնում է հետագա ճշման՝ 391—2 թ.։

Շատ ջանքեր պետք չէին, որպեսզի բանասիրությունը մի քանի Ադոնց-Մանանդյան վարկածը, որ հենված էր պարզ թյուրիմացության վրա։ Ադոնցը վկայաբերում է արտաքին աղբյուրները՝ «Արտաքին աղբյուրներից քաջահայտ է»։ Բայց արտաքին աղբյուրներից քաջահայտ է, որ Ակակիոսը Ամիդի եպիսկոպոս է կարգվել ոչ թե 419/20, այլ 400 թ., իսկ Բարիլասը (Բաբի-

¹ Կորյուն. Վարք Մաշտոցի. Երևան, 1941, էջ 98, 100։

² Մեսրոպ Մաշտոց (չողվածների ժողովածու). Երևան, 1962, էջ 223։

³ Հ. Մանանդյան. Քննական տեսություն հայ ժողովրդի պատմության. Երևան, 1957, հ. Բ, էջ 264։

դաս) Նդեսիայի աթոռին նստեց 399 թ. և նրա եպիսկոպոսության շրջանն ավարտվում է 409-ին⁴։ Ոչ մի ժամանակական անհեթեթություն։

Թվում է խնդիրը փակվեց, Ադոնց—Մանանդյան վարկածը զուրկ է հիմքից։ Բայց ահա անսպասելիորեն հանդես է գալիս Բ. Ուլուբաբյանը և այդ անհիմնության վրա հիմնում իր կառույցը⁵։

Ուլուբաբյանը ոչ մի խոսք չի ասում «հակասության» մասին, որ իբր գոյություն ունի Կորյունի բնագրի և նրա ժամանակագրական վերջաբանի միջև, բայց այդ «հակասությունից» բխող Ադոնցի և Մանանդյանի եզրակացությունները ընդունում է իբրև ելակետ, որ Կորյունի ժամանակագրական վերջաբանը անվավեր է, և գլուտի թվագրման համար պետք է առաջնորդվել Կորյունի բնագրի և Ղազար Փարպեցու տվյալներով։ Բ. Ուլուբաբյանը գլուտի թվականը սահմանում է 393 թ.։ «Ջրուցարանի» հեղինակն իր բոլոր փաստադրվածքները բացառապես վերցնում է Հ. Մանանդյանից, որոնք սակայն հետագայում հերքվել են, կամ որոնցից հրաժարվել է ինքը՝ Մանանդյանը։

Այսպես։ Հ. Մանանդյանը մերժում էր Կորյունի ժամանակագրական վերջաբանը, գտնելով, որ այն ընդմիջարկություն է և չի կարող վերագրվել իրեն Կորյունին, բայց հետո հրաժարվում է իր տեսակետից։

Այդ հանգամանքը ցավով է նշում Բ. Ուլուբաբյանը. «Դժբախտաբար,— գրում է նա,— Հ. Մանանդյանը հետևողական չեղավ իր այս տեսակետի մեջ և հետագայի մի ուսումնասիրության մեջ փորձեց Կորյունի գրքին կապած ժամանակագրությանը տալ բարեպատեհ տեսք»⁶, կամ՝ «ի՜նչ որ առաջ համարվում էր ընդմիջարկություն և չէր կարող վերագրվել Կորյունին, հիմա դառնում է Կորյունինը»⁷։ Ոչ թե դժբախտաբար, այլ տրամաբանաբար։ Եթե չկա հակասությունը, չկա և հետևությունը։

Նկատենք, որ Ն. Ադոնցը նույնպես հետագայում հրաժարվեց իր տեսությունից, գտնելով, որ «Մաշտոցի հետազոտությունները՝ հայ այբուբենի ըստեղծելու համար 392-ին սկսված՝ ավարտեցան 405-ին»⁸։

405 թ., ուրեմն ընդունվում է ժամանակագրական վերջաբանը։ Այդ թվականը կարելի է ստանալ ժամանակագրական վերջաբանի միջոցով։ Եվ երբ Ն. Ադոնցն ու Հ. Մանանդյանը «հետևողական» չեղան, «Ջրուցարանի» հեղինակը փորձում է «հետևողական» լինել և շարունակում է հենվել լքված փաստարկներին։

«Կորյունի գրքի վերջի ժամանակագրության հետագա ընդմիջարկություն լինելու ապացուցելու համար Հ. Մանանդյանը սկզբնապես վկայակոչում էր...»⁹, «Հ. Մանանդյանը վկայակոչում էր նաև...»¹⁰, «գիտնականը գտնում էր...»¹¹, «Մանանդյանը վկայակոչում էր նաև...»¹²,—այդպես են ըս-

⁴ Synodicon Orientale ou recue'l de sinodes Nestoriens. publié, traduit et annoté par J. B Chabot. Paris, MDCCCII (1902). p. 255, 276; Ն. Ադոնցյան. Մ. Մաշտոց վարդապետ. Վիեննա, 1949, էջ 111—112; Ա. Աբրահամյան. Հայ գրի ստեղծման տարիքի վերաբերյալ. Մաշտոց (Ժողովածու), Երևան, 1963, էջ 118—120; Ե. Տեր-Մինասյան. Հայաց գրեթե գլուտի թվականը և այլ հարակից խնդիրների մասին.— «Բանբեր Մատենադարանի», № 7, 1964, էջ 26—30; Հ. Քոբուսյան. Քանի մի խնդրական կետեր Կորյունի գրքին մեջ.— «Բազմավեպ», 1932, էջ 259—260։

⁵ «Սովետական» հրահանություն. 1981, № 8, էջ 149—155, նույնը՝ «Սովետական» Հայաստան, 1983, թ. 5, էջ 26—29 և Բազմաթուղի Ուլուբաբյան. Ջրուցարան. Երևան, 1988, Գ. Բ, էջ 91—106։

⁶ Ջրուցարան, էջ 97։

⁷ Նույն տեղում, էջ 99։

⁸ Ն. Ադոնց. Հայագիտական և աշխարհագրական տարեգրությունը.— «Անահիտ», Փարիզ, 1929, № 3, էջ 16։

⁹ Ջրուցարան, էջ 100։

¹⁰ Նույն տեղում, էջ 102։

¹¹ Նույն տեղում, էջ 97։

¹² Նույն տեղում։

կրսվում հեղինակի պարբերությունները. և այդպես են վկայակոչվում վկայակոչումները: Իսկ ինչ է վկայակոչում ինքը՝ «Զրուցարանի» հեղինակը: Նա գրում է. «Մաշտոցյան Մատենադարանում պահվող կորյունյան ձեռագրերից միայն երեքը կարող են հպարտանալ իրենց հնությամբ. երկուսը XIV դարից են, մեկը (№ 3791)՝ XV-ից: Այս երեքից ոչ մեկում ոչ ժամանակագրություն կա, ոչ էլ նրա հետքը»¹³:

Նա բերում է «Մատենադարանում պահվող կորյունյան ձեռագրերի» կամ «Կորյունի երկի բուն ձեռագրերի» համարները իրենց էջերով. ձեռագիր № 3787, էջ 116բ—120բ, № 3791, էջ 195բ—201բ և № 3797¹⁴:

Պահանջներ ձեռագրերը և թերթներ էջերը, և որքան էլ տարօրինակ է, դրանք «կորյունյան ձեռագրեր» չեն կամ «Կորյունի երկի բուն ձեռագրեր, որոնք կարող են հպարտանալ իրենց հնությամբ», այլ հայսմավուրք և ճառընտիր: Հայսմավուրք՝ միջնադարյան օրացույց, որի մեջ յուրաքանչյուր օրվա տակ նշված է եկեղեցու հետ կապված որևէ տոն կամ հիշատակություն: Ձեռագիր № 3787, Մեհեկի ԺԳ-ն վերաբերում է Մաշտոցին. «Ի յիշատակի սրբոյն Մեսրոպայ վարդապետի, զոր ասացեալ է Կորեան սրբոյ յաղագս վարուց նորա թէ ուստ էր», փոքրիկ մի բնագիր, որ կենսագրական տեղեկություններ է պարունակում: Սկզբի հատվածը, մինչև Մաշտոցի Ասորիք գնալը, համապատասխանում է Կորյունին՝ նկատելի տարբերություններով: Իսկ Ասորիքից վերադառնալուց հետո Մաշտոցի կրոնական վարքն է: Չկա առաջաբանությունը, որ այնքան մեծ տեղ է զբաղում Կորյունի մոտ, չկա՝ որ Մաշտոցը գնում է Հայաստանի արևմտյան հատվածը, որ վրաց և աղվանից համար գիր է ստեղծում, իսկ 106բ էջից բնագիրը բոլորովին հեռանում է և զուտ կրոնաբարոյական նյութեր են. «Անդ էր ապա շարբենալ գինով» և այլն և Կորյունի հետ ոչ մի կապ չունեն: Այնուհետև գալիս է մի այլ հատված (107ա—108ա)՝ «Եւ վասն մահուան սրբոյն Մեսրոպայ», որ քաղված է հորենացուց, — «Տեսեալ թէ ի վերջ հասեալ է թագաւորութիւնն Հայոց...»: Դա պարզապես սրբի վարք է, քաղածո, հավուր պատշաճի և ոչ թե գրերի գյուտի և նրա ստեղծողի պատմությունը:

Ձեռագիր № 3797-ը լիովին համապատասխանում է ձեռագիր № 3787-ին: Մեհեկի ԺԳ օրվա տակ նույն նյութն է, ավելի զրազեղ գրություններ: Ընդօրինակված են իրարից կամ մեկ նախամորից:

Ձեռագիր № 3791-ում մեզ հետաքրքրող բնագրի վերտառությունն է՝ «Յիշատակարան պատմութեան երանելոյն սրբոյն վարդապետի Մեսրոպայ, զոր արարեալ է նորին աշակերտին՝ Կորեան»: Սկսվում է ինչպես Կորյունի մոտ՝ «ԶԱզգանազեան ազգին և զՀայաստան աշխարհին», բայց բովանդակությունը զուգահեռ է գնում հորենացուն: Պատմում է, թե ինչպես Մեսրոպը գնաց Դանիելի մոտ, ոչինչ չստացվեց և գիր հորինեց ոչ ի քուն երազ և այլն. կամ՝ «Եստեղծ զնշանագիրսն մեր հանդերձ Ռոփանոսի՝ աշակերտի Սալիփանու»: Ամբողջ գործը ծաղկաքաղ է, հիմնականում՝ հորենացու:

Մնում է զարմանալ, ինչպե՞ս է արելի է դրանք համարել կորյունյան ձեռագիր, մի՞թե զեղծում է դա: Բերես վերնագրերն են շփոթի մեջ գցել: Ինչևէ, եթե այդ սահմաններում պատկերացնենք Կորյունի բնագիրը...

«Բայց գուցե ավելի հին ձեռագրերում այն գոյություն է ունեցել և վերականգնվել է նորագույնների» մեջ, որոնք XVII—XVIII դարերից են, — շարունակում է «Զրուցարանի» հեղինակը, — Մատենադարանում հիշյալ ձեռագրերից առավել հինը չկա, որ Կորյունի երկն ունենա: Ուրիշ ձեռագրատներում էլ չեն գտնվել այդպիսիք: Միայն մեկը, որ պահվում է Փարիզի ազգային գրադարանում և համարվում է ռենտիր և հարազատագույն օրինակ մի պատ-

¹³ Նույն տեղում, էջ 102—103:

¹⁴ № 3797 ձեռագրի էջը «Զրուցարանում» և «Սովետական Հայաստանում» չի նշված: № 3787 ձեռագրի էջերը «Սովետական Հայաստանում» և «Զրուցարանում» ճիշտ չեն՝ 116բ—120բ: Պեճը է լինի՝ 104ա—107ա և 107ա—108ա

մութեան Կորեան՝ ի ստուար և հնագիր՝ ԺԲ գարու ճառընտիրի...» (Կորին, Պատմութիւն..., Վենետիկ, 1894, էջ 6), Վենետիկի Մխիթարյաններն են հրատարակել անցյալ դարի կեսին (տե՛ս «Սոփեբք հայկականք», հտ. 11, Վենետիկ, 1854): Այս «ընտիր և հարազատագոյն» ձեռագրում ևս ժամանակագրութիւնից ոչինչ չկա»¹⁵:

Չես հասկանում, ինչի՞ համար է այդ անգիտացումը: Ինչու՞ պիտի այդ տեղ ժամանակագրութիւնից որևէ բան լինի: Բնագիրը Կորյուն չէ: Այն րստեղծվել է շատ ավելի ուշ, Կորյունի և խորենացու բանաքաղությամբ և կոչվում է Սուտ Կորյուն: Դա այնքան հայտնի է բոլորին՝ ով մոտ է բանասիրութեանը և ով մոտ չէ բանասիրութեանը: «Ընտիր և հարազատագոյն», — այդպես կարող էին ասել բնագրի հրատարակիչները 1894 թ.: Բայց 1894 թ. շատ ժամանակ է անցել և այսօր նրանցից քաղվածք բերել ներկա եղանակով՝ «Համարվում է ընտիր և հարազատագոյն օրինակ մի պատմութեան Կորեան», նշանակում է... դժվար է ասել ինչ է նշանակում: Մ. Աբեղյանը իր համեմատական բնագրի աղբյուրների ցանկում «Ս» պայմանանիշի տակ գրում է. «Սուտ-Կորին. Տպված է Վենետիկի 1894 թ. և Թիֆլիսի 1913 թ. հրատարակութիւնների հետ: Քանի որ դրա մեջ ամբողջ հատվածներ կան Կորյունից առնված, բնականաբար որոշ դեպքերում պիտանի է Կորյունի բնագրի մեջ եղած աղճատումներն ուղղելու համար: Օգտագործել եմ սակավաթիվ դեպքերում»¹⁶:

Հատվածներ կան Կորյունից առնված և ոչ թե հատված է պակաս Կորյունից:

«Ջրուցարանի» հեղինակը «Մանանդյանը վկայակոչում էր» շարքից բերում է Մատենադարանի տոմարական բնագրեր պարունակող երեք ձեռագիր՝ № 1495, 8575 և 6644, «որոնցում հայերեն գրերի գյուտի տարի է նշվում 391—392 թվականը»¹⁷:

Երեք ձեռագրերն էլ բերված են թյուրիմացաբար և հիմք չեն տալիս հաստատելու, որ գրերի գյուտը տեղի է ունեցել 391—392 թ.: Դա արդեն դիտված է և հարկ չկա վերստին կանգ առնել այդ հարցի վրա¹⁸: Ուղղակի հպանցիկ ասենք, որ № 1495 ձեռագիրը տալիս է նման թվական, բայց այնպիսի մի ցանկում, ուր բոլոր տվյալները կա՛մ սխալ են, կա՛մ ունեն առասպելական բնույթ և անկարելի է հավաստիանալ, թե այդ մեկը ճիշտ է: № 6644 ձեռագիրը գյուտի թվականի մասին ժամանակագրական նշում առհասարակ չունի, իսկ № 8575 ձեռագրի համաձայն գյուտը ընկնում է ոչ թե 391—392-ին, այլ՝ 429-ին: Այդ երեք ձեռագրերը նորից վկայակոչել իբրև փաստարկ առնվազն տարօրինակ է: «Ջրուցարանի» հեղինակը, սակայն, ավելացնում է չորրորդը՝ ձեռագիր № 1532:

Որտեղից՞ է այս չորրորդը: Թերևս Ուլուբաբյանը սեփական հետազոտութեամբ նոր և ճիշտ աղբյուր է գտել: Բայց Մատենադարանի № 1532 ձեռագիրը ոչ մի տոմարական բնագիր չունի: Այստեղ պարզ թյուրիմացութիւն կա: «Ջրուցարանի» հեղինակը № 6644 ձեռագրի տարեթիվը՝ 1532, Մանանդյանից արտագրել է որպես առանձին ձեռագրական միավոր¹⁹:

Տարեթիվը շփոթել ձեռագրական միավորի հետ, անշուշտ, վրիպում է: Բայց հեղինակը քննում է մի այնպիսի բանասիրական խնդիր, ինչպիսին է

¹⁵ Ջրուցարան, էջ 103:

¹⁶ Կորյուն, էջ 21

¹⁷ Ջրուցարան, էջ 97:

¹⁸ Տե՛ս Ե. Տեր-Մինասյան. Հայոց գրերի գյուտի թվականի և այլ հարակից խնդիրների մասին, էջ 34—38: Նույն ի՞ Պատմա-բանասիրական հետազոտություններ. Երևան, 1971, էջ 438—443: Ա. Աբրահամյան. Հայ գրի ստեղծման տարեթիվը, էջ 111—114:

¹⁹ Տե՛ս Զ. Մանանդյան. Հայ գրերի գյուտի տարեթվի հարցի շուրջը. Մեսրոպ Մաշտոց (ժողովածու), ՀՍՍՀ ԳԱ հրատ., Երևան, 1962, էջ 85:

հայոց գրերի գյուտի թվականը և չի փորձում հավաստիանալ աղբյուրների մեջ: Գոնե արտագրելիս ուշադիր լինե՞ր:

«Զրուցարանի» հեղինակն իր աշխատանքը կոչում է քննական պրպտում: Մի՞թե այդպես է լինում քննական պրպտումը:

Մի ուրիշ օրինակ. «Գրքի մեզ հասած բնագրի բուն շարադրանքի տեղեկությունները սրանք են»,— գրում է «Զրուցարանի» հեղինակը: Նա նկատի ունի Կորյունի «Վարք Մաշտոցին» և ա և ք կետերով բերում է «բուն շարադրանքի տեղեկությունները»: Ահա չ կետը. «Երկու ամի» (թե՞ երկու տարի) ապարդյուն գործածվելուց հետո մերժվել են Դանիելյան գրերը, որովհետև պարզվել է, որ նրանք, լինելով ընդամենը 22 տառ, պակասավոր են»²⁰:

Բայց Կորյունի բնագրում ոչ մի տեղ չի առաված, որ դանիելյան գրերը 22 տառ ունենին: Ինչպե՞ս կարելի է հորինվածք թույլ տալ և աղբյուրին վերագրել այն, ինչ նա չունի: Դժվար է մտածել, որ Բ. Ուլուբաբյանը Կորյունի բնագիրը չի կարդացել: Կորյունը չի էլ ասում. թե տառերը պակասավոր էին: Դա գալիս է գրաբարի թյուր ըմբռնումից: «Իսկ իբրև ի վերայ հասնալ, թէ չեն բաւական նշանագիրքն...»,— «չեն բաւական» պետք է թարգմանել ոչ թե բավարար չեն, պակասավոր են, այլ՝ անբավական են, անկարող, անօգտակար, ոչ պիտանի՝ գրաբարյան ճիշտ իմաստով:

Կորյունի ժամանակագրական վերջաբանում ասված է, որ Մաշտոցը վախճանվել է Հազկերտ II-ի առաջին տարում: Իսկ Թ. Նյուդեբեքի համաձայն Հազկերտի գահակալության առաջին տարին համապատասխանում է 438 կամ 439 թ.: «Զրուցարանի» հեղինակն այստեղ հակասություն է տեսնում: «Մաշտոցը վախճանվել է 440 թ. փետրվարի 17-ին»,— գրում է նա, — ուրեմն Հազկերտ Բ-ի երկրորդ կամ երրորդ տարում և ոչ առաջին. ինչպես նշում է ժամանակագիրը:

Զրուցագիրն ուզում է ասել, որ սխալ է ժամանակագրությունը, բայց այդտեղ սխալ չկա:

Նախ՝ Կորյունը ասում է, որ Մաշտոցը վախճանվեց Հազկերտ II-ի առաջին տարում՝ «Յառաջնումն ամի երկրորդ Յազկերտի», նա չի ասում՝ 440 թ. փետրվարի 17-ին: Այդ թիվը որոշում է Դյուլորին, իսկ Հազկերտ II-ի առաջին տարին՝ 438:9 արտածում է Նյուդեբեքն, և եթե անհամաձայնություն կա, անհամաձայնությունը Դյուլորինի և Նյուդեբեքի տվյալների միջև է և ոչ թե Կորյունի հաղորդման, մանավանդ պարզ չէ Հազկերտի թագավորության առաջին տարին 438 է, թե 439: Եթե այդպես է, հնարավոր է և՛ 440: Զրուցագիրը կարող էր Կորյունի ժամանակագրական տվյալը համարել անճիշտ, եթե վստահ լիներ, որ ճիշտ է նրա տոմարական արտահայտությունը և պետք էր հավաստիանալ այդ խնդրում: Բայց հեղինակը հենց այնպես վերցրել է պատրաստի թվեր և նրանց միջև տեսել հակասություն:

Բայց, որքան էլ անսպասելի, հենց այնպես էլ այդ թվերի միջև ոչ մի հակասություն չկա:

Պարսից մոտ տարին սկսվում է նավասարդից, և թագավորների գահակալությունը հաշվվում տարեսկզբից, երբ էլ որ այն եղած լինի: Նյուդեբեքն Հազկերտ II-ի գահակալության համար երկու թիվ է նշում, որովհետև պարզ չէ՝ այն 438-ի, թե 439-ի նավասարդին է համընկնում: Այստեղ մեզ օգնության է գալիս Կորյունի մի տվյալ պատումի մեջ և ոչ թե ժամանակագրական վերջաբանում՝ Սահակ Պարթևի մահվան ժամանակը. «Յառաջնումն ամի երկրորդ Յազկերտի որդու Վառամայ... ի կատարեալ ամսեանն նավասարդի» — երկրորդ Հազկերտի առաջին տարին, նավասարդ ամսի վերջին:

436-ից մինչև 439 թ. նավասարդի մեկը հայոց տոմարում համընկնում է օգոստոսի 9-ին, իսկ 30-ն անում է սեպտեմբերի 7-ը: Վարդան Արևելցու մի ուրիշ տեղեկություն բերում է հետագա ճշտման: Վարդանը գրում է, որ Սահակ Պարթևի մահվան օրը հինգշաբթի էր: Դյուլորինն նկատի ունենալով

նախապես «Սոփերբում» հրատարակված այս տվյալը, որոշում է Սահակ Պարթևի մահվան տարին՝ 439, քանի որ 436-ից 439 թթ. միջև 439 թ. սեպտեմբերի 7-ն է հինգշաբթի։ Կորյունը, դարձյալ պատումի մեջ, ասում է, որ Մաշտոցը մահացավ Սահակից վեց ամիս հետո, մահեկան ամսի 13-ին՝ «յետ ամսոյ վեցից անցելոց... յերեքտասներորդում ամսեանն մեհեկանի»։ Եթե Սահակը մեռել է 439 թ. սեպտեմբերի 7-ին, ապա նրանից վեց ամիս հետո մեհեկանի 13-ն ընկնում է 440 թ. փետրվարի 17-ին։

Այսպիսով, քանի որ Սահակ Պարթևը վախճանվել է Հազկերտի առաջին տարում, ապա ուրեմն Հազկերտի առաջին տարին 439-ն է և այն ձգվում է 439-ի օգոստոսից մինչև 440 թ. օգոստոսը, իսկ Մաշտոցը մեռել է 440 թ. փետրվարին՝ Հազկերտի առաջին տարում։

Ինչպես տեսնում ենք «Զրուցարանի» հեղինակի բերած փաստարկն անիմաստ է, և ժամանակագրական տվյալները հաստատում են, որ Կորյունի բնագրի և վերջաբանի միջև հակասություն չկա։

Իսկ «քննական պրպտումը»...

Մերժելով Կորյունի վերջաբանը «Զրուցարանի» հեղինակը առաջարկում է Մաշտոցի գյուտի ժամանակը որոշել Վառձապուհի հինգերորդ տարով, իսկ նրա առաջին տարվա համար իբրև լուծման բանալի ընդունել Ղազար Փարպեցու ժամանակագրական տեղեկությունը։

Վառձապուհի հինգերորդը՝ լավ, բայց տեսնենք, թե ինչ է ներկայացնում իրենից Ղազար Փարպեցու ժամանակագրական տեղեկությունը։

Ղազար Փարպեցին գրում է, որ Հայաստանի բաժանումից հետո պարսից Շապուհ արքան նախարարների խնդրանքով թագավոր է կարգում հոսրովին. «Եւ արքայն Պարսից Շապուհ կատարեալ զհայցուածս նոցա՝ շնորհէր նոցա թագաւոր հոսրով անուն, յազգէն Արշակունեաց»։ Որոշ ժամանակ անց՝ «յետ ժամանակի ինչ անցելոյ», Շապուհը գահազուրկ է անում նրան և նրջանակում Վառձապուհին։ Փարպեցին ապա պատմում է գրերի գյուտի, Սահակի և Մաշտոցի գործունեության, Աստվածաշնչի թարգմանության մասին, նկատելով, որ այդ ամենը կատարվեց Վառձապուհի ժամանակ։ Այնուհետև Վառձապուհը դեռ երկար թագավորում է և մեռնում խոր ծերության մեջ. «Եկաց յետ այսորիկ թագաւորն Վառձապուհ ամս բազումս,—որոշ ձեռագրերում, ինչպես և հոսրենացու մոտ՝ ամս քսան և մի,—և հասեալ ի լերկար ծերութեան վախճանեցաւ յանկողնի իւրում խաղաղական հանգստիւ յաշխարհիս Հայոց»։ Վառձապուհից հետո մեռնում է Շապուհը. «Յետ այսորիկ մեռաւ և Շապուհ արքայն Պարսից և թագաւորեաց Վառձապուհի նորա, որ էր Կրման արքայ»²¹։

Այսպես, Շապուհը թագադրել է հոսրովին, ապա՝ Վառձապուհին, անցել է ամս բազումս կամ 21 տարի, Վառձապուհը մեռել է խոր ծերության մեջ և ապա նոր ավարտվել է Շապուհի գահակալության շրջանը, որ սակայն իշխել է հինգ տարի։

«Դուրս է գալիս կատարյալ անհեթեթություն»,—գրում է Ե. Տեր-Մինասյանը²², «Ստացվում է մի կատարյալ անհեթեթություն», միանշանակ եզրակացնում է Ա. Աբրահամյանը²³, «Շատ կշեղեինք հոս մեր խնդրեն, եթե Ղազարա խառնակ տեղեկությունը քննել ուզեինք»,—ավելի վաղ նկատել է Հ. Մարկվարտը²⁴։

Բ. Ուլուբարյանը նույնպես չի քննում «Ղազարա խառնակ տեղեկությունը», որ շեղվի իր խնդրից, բայց այդ տեղեկությունը հայտարարում է

21 Ղազարայ Փարպեցույ Պատմութիան Հայոց և թուղթ առ Վահան Մամիկոնեան, աշխ. 9. Տեր-Մկրտչեան և Ստ. Մալխասեան. Թիֆլիս, 1904, էջ 18։

22 «Բանբեր Մատենադարանի», № 7, էջ 32։

23 Մկրտչայ Մաշտոց, 1963, էջ 122—123։

24 Հ. Մարկվարտ. Պատմություն հայերեն նշանագրերու և վարուց ս. Մաշթոցի. Վիեննա, 1913, էջ 53։

«վստահելի», «աներկբայելի» և գտնում, որ Վոսմշապուհի գահակալության ժամանակը որոշելու համար «չկան առավել արժանահավատ աղբյուրներ»:

Ի՞նչ է դա, անգոսնում, թե՞ անգիտացում:

«Զրուցարանի» հեղինակը ծանոթ է Ե. Տեր-Մինասյանի և Ա. Աբրահամյանի աշխատանքներին, բայց լռում է, և այդ լռությունը շարունակական է: Գյուտի թվագրման մասին նա իր հոդվածը առաջին անգամ տպագրում է 1981 թ.: Նույն թվականին «Պատմա-բանասիրական հանդեսում» հոդված տպագրվեց մեր կողմից «Հայոց գրերի գյուտի թվականը» վերտառությամբ, ուր խոսվում է Ղազար Փարպեցու խառը ժամանակագրության մասին²⁵, ապա՝ «Մաշտոց» գրքում, 1982 թ.²⁶ Բ. Ուլուբաբյանն իր հոդվածը վերատպում է 1983 թ. և՛ նույն լռությունը: Երկու տարի անց, 1985 թ. Մխիթարյան գիտնական Պ. Անանյանը հանդես է գալիս նրա հոդվածի առթիվ և նկատում, որ չի կարելի հենվել Ղազար Փարպեցու անճիշտ տեղեկության վրա²⁷: 1988 թ. Բ. Ուլուբաբյանը իր «Զրուցարանի» Բ հատորում զետեղում է հոդվածը և... նույն լռությունը:

Այդպես: Միթե զրուցագիրը կարծում է, որ «կատարյալ անհեթեթությունը» կարելի է իմաստավորել լռությամբ:

Լռությամբ: Ոչ, Զրուցարանի հեղինակը չի լռում, նա անդրադառնում է Պ. Անանյանին... տողատակում: «Իմ այս տեսակետի դեմ վերջերս առարկություն է հրապարակել վենետիկի Մխիթարյան միաբանության վարդապետ, անվանի բանասեր Պ. Անանյանը,—գրում է նա:—Հարգելի գիտնականը, ցավոք, նախորդների ու իր սեփական (նախկին) ուսումնասիրությունների կադապարները չհաղթահարելով՝ վերստին կարևորություն չի տալիս Կորյունի երկի ամենահիմնական տեղեկությանը՝ որ գրերի գյուտը տեղի է ունեցել Վոսմշապուհ թագավորի գահակալության 5-րդ տարում, իսկ Վոսմշապուհին էլ թագավոր է կարգել Պարսից արքա Շապուհ Գ-ը՝ գահակալած 383—388 թթ.: Ընդդիմախոսության մեջ արժարժված մյուս հարցերին ու մանրամասներին կանգնողառնամ պարբերական մամուլում»²⁸,

Դժվար է ասել, դիմելու այս բարեկիրթ ձևերը՝ «անվանի բանասեր», «հարգելի գիտնական», «ցավոք» ինչպես են զուգորդվում «կադապարի» հետ, կադապարն է մտնում այս բարեկիրթ ձևերի մեջ, թե՞ բարեկիրթ ձևերը՝ կադապարի, բայց այդ թողնենք: Ո՞վ ասաց, որ Պ. Անանյանը կարևորություն չի տալիս Վոսմշապուհի 5-րդ տարվա տվյալին: Նա նույնիսկ մի առանձին բաժին է նվիրել դրան՝ «Վոսմշապուհի գահակալության տարին» վերտառությամբ, իսկ հոդվածի խորագիրը ինքնին հենց այդ է ասում. «Գրոց գյուտի թվականը և Վոսմշապուհ հայոց թագավորի վեցերորդ տարին»: Նա կարևորություն չի տալիս ոչ թե Վոսմշապուհին վերաբերող տվյալին, այլ Ուլուբաբյանի մեկնաբանությանը: Նա գտնում է, որ Վոսմշապուհի գահակալության մասին Ղազար Փարպեցու տեղեկությունը անհավաստի է, որ այն պետք է հաշվել Հազկերտ I-ի երկրորդ տարուց և որ դա կապ չունի Շապուհ Գ-ի հետ:

Իսկ ի՞նչ մյուս հարցեր և մանրամասներ, որոնց խոստանում է անդրադառնալ հեղինակը պարբերական մամուլում: Մյուս հարցեր չկան և մանավանդ՝ մանրամասներ: Պ. Անանյանի քննարկած բոլոր հարցերը վերաբերում են մի խնդրի՝ թե՞ ինչպես է կարևորություն տվել Ուլուբաբյանը Վոսմշապուհի 5-րդ տարուն և որոշել գյուտի թվականը, և «Զրուցարանի» հեղինակը պարավոր էր անանջատ անդրադառնալ: Բայց դա հենց միևնույն լռությունն է, պարբերական մամուլի մասին հրապուրիչ խոստումով:

²⁵ «Պատմա-բանասիրական հանդես», 1981, № 3, էջ 64—80:

²⁶ Ա. Մարտիրոսյան. Մաշտոց. Երևան, 1982, էջ 208—209:

²⁷ Տե՛ս Պ. Անանյան. Գրոց գյուտի թվականը և Վոսմշապուհ Հայոց թագավորի վեցերորդ տարին.—«Բազմավեպ», 1985, № 1—2, էջ 127—141:

²⁸ Զրուցարան, Բ, էջ 106:

Գուցե «Զրուցարանը» տեղը չէ։ Թերևս։ Բայց միթե մնացածը, որ ասված է, տեղում է ասված։

Գյուտի տարեթիվը զուտ բանասիրական խնդիր է և, հասկանալի է, կարելի է արժարժեք կամ՝ պետք է արժարժեք գիտական մամուլում։ Բայց Բ. Ուլուբաբյանը երեք անգամ հրապարակում է միևնույն հոդվածը, չնչին տարբերությամբ և ոչ մի անգամ՝ գիտական մամուլում։ «Սովետական դրականություն» ամսագրում լույս է տեսնում «Հաղորդում» ընդհանուր վերադասության տակ, «Սովետական Հայաստան» ամսագրում՝ «Գրերի գյուտի տարեթիվը 393 է» խորագրով, և 393-ը շեշտված, սե, արտահայտիչ թվերով, որ ռեկլամ է հիշեցնում, իսկ երրորդ անգամ՝ «Զրուցարանում»՝ մանուկների համար։ Ուրեմն ի՞նչ. հաղորդում է դա, ռեկլամ, զրույց, թե՛ թե՛ քննական պլուրալություն, և ինչու է խուսափում գիտական մամուլից։

Բայց միայն լուծյամբ չէ որ լուծում է հեղինակը։ Կան և ուրիշ միջոցներ։ «Հեներ... նորերը», — հեղինակն այսպես լայն ափով է կշռում բանասիրական խնդիրները, և շատ բան մնում է ափի տակ։ Եվ մի տեսակ վերամբարձ հայացք կա հենրի ու նորերի նկատմամբ. «Հեները փորձում էին... իսկ նորերը փորձում են» և նա է բերում ճշմարտությունը։

Եվ ճշմարտությունը ներկայացվում է բոլորովին անճիշտ։ Գնահատելով Մանանդյանին, որ առաջին անգամ կարծիք է հայտնել Կորյունի ժամանակագրական վերաբանի անվավերության մասին, և ապա՝ դժգոհելով, որ նա հետագայում հրաժարվեց իր կարծիքից, «Զրուցարանի» հեղինակը գրում է. «Մրանից հետո էր, որ մեր մեկ ուրիշ անվանի բանասեր՝ Նրվանդ Տեր-Մինասյանը, իր մի ընդարձակ ուսումնասիրության մեջ կրքոտ ընդդիմախոսություն բացեց Մանանդյանի տեսակետի դեմ և, իրավացիորեն քննադատելով նրա հետազոտական աշխատանքի մի քանի անհամոզիչ արդյունքները, հանիրավի մերժեց նաև նրա շատ կարևոր պնդումը՝ գրերի գյուտի ժամանակը որոշելու համար ելակետ ընդունել Կորյունի պատմության բուն նյութը»²⁹։

Ստացվում է, որ Ե. Տեր-Մինասյանը Մանանդյանին քննադատում է նրա կարծիքը փոխելու համար և նրա «մի քանի անհամոզիչ արդյունքները» դրան են վերաբերում։ Բայց բոլորովին հակառակը։ Ե. Տեր-Մինասյանը քննադատում է Մանանդյանին նրա նախկին տեսության համար, իսկ որ կարծիքը փոխել է, հենց դա է համարում դրական։ «Մի քանի անհամոզիչ արդյունքները» բացառապես այն փաստարկներն են, որ վերաբարձում է Ուլուբաբյանը և ղնում իր տեսության հիմքում, ինչպես օրինակ, Մատենադարանի երեք ձեռագրերի տոմարական նյութերը, Ղազար Փարպեցու՝ Վռամշապուհին վերաբերող ժամանակագրական տվյալը և այլն։ Ահա ինչ է «իրավացիորեն քննադատում» Ե. Տեր-Մինասյանը։

Կարելի է, իհարկե, վերակոչել որևէ մերժված կամ մոռացված տեսություն, եթե ցույց է արվում, որ ճիշտ չի եղել նրա նկատմամբ վերաբերմունքը, բայց հենց այնպես գյուտը V դարից փոխադրել IV դար, մեկ սափնամյակ առաջ. որովհետև դա կարող է ավելի տպավորիչ լինել և արձագանք տալ՝ չի եղնում գիտական շահագրգռություններից։

Կորյունի «Վարք Մաշտոցին» Մաշտոցի կենսագրության և գրերի գյուտի առաջին սկզբնաղբյուրն է, և չափազանց կարևոր է, թե որքան է այն անխաթար և հավաստի։ Հայագիտության մեջ այդ հարցում, նույնիսկ գերքննադատության շրջանում, որևէ տարակարծություն չի եղել։ Կարելի է բացառել միայն Ի. Զավախիշվիլուն։

Բ. Ուլուբաբյանն իր վարկածը կառուցել է նույն սկզբունքի վրա, բայց ոչ նույն խնդրով. որ «Վարք Մաշտոցին» ամբողջական չէ, որ իր մեջ հակասություններ կան և օտարամուտ հատված։ Իսկ այդ հատվածը սկզբնաղբյուրի համար անգնահատելի է, դա երկի ժամանակագրական հենքն է։

²⁹ Նույն տեղում, էջ 99։

Ահա ինչպիսի թանկ գնով է վճարվում փոքրիկ մի փառասիրություն³⁰։

Այժմ գյուտի թվագրումը։

«Եւ արդ լինի համար ամաց հաւատոց երանելոյն ամբ քառասուն և հինգ,— գրում է Կորյունը,— և ի դպրութենէն Հայոց մինչեւ ցվախճան սրբոյն՝ ամբ երեսուն և հինգ. որք համարին այսպէս. թագաւորեալ Կրմանայ Պարսից արքայի ամս վեց և Յազկերտի ամս քսան և մի և յառաջնումն ամի երկրորդ Յազկերտի որդւոյ Վռամայ վախճանեցաւ երանելին։

Եւ արդ, առնու համար ամաց սրբոց հաւատոց ի շորորդում ամէն Կրմանայ արքայի մինչեւ ցառաւին ամն երկրորդ Յազկերտի որդւոյ Վռամայ, և դպրութեանն Հայոց յութերորդ ամէ Յազկերտի առեալ սկիզբն»³¹։

Երբ պատմագիտության կողմից ընդունված պարսից իշխողների գահակալական տարիները համադրում ենք Կորյունի ժամանակագրական տվյալների հետ, ստացվում են անհարիր թվեր։ Այսպես, Մաշտոցի կրոնավորությունն սկսվել է Վռամ Կրմանի շորորդ տարուց և տեղի 45 տարի մինչև իր մահը։ Վռամ Կրմանը թագավորել է 388—399 թ., նրա շորորդ տարին 392-ն է, որից 45 տարի հետոն անում է 437։ Բայց Մաշտոցը վախճանվել է Հաղկերտ II-ի առաջին տարում, որ ընկնում է 438/9 թ.։ Հայոց դպրությունն սկսվել է Հազկերտ I-ի ութերորդ տարուց և մինչև Մաշտոցի մահը ձգվել 35 տարի։ Հազկերտ I-ը գահակալել է 399թ., նրա ութերորդ տարին անում է 407։ 407-ից երեսունհինգ տարի՝ հանգում է 442-ին և դարձյալ չի համընկնում Հազկերտ II-ի առաջին տարուն և այլն։

Խնդիրն ունի երկու պայման. Կորյունի ժամանակագրական տվյալները և պարսից թագավորների տոմարական ժամանակագրությունը։ Եթե նրանց մեջ ինչ-որ բան ճիշտ չէ, խնդիրը չի կարող լուծման հանգել։

Նախ՝ Կորյունի ժամանակագրությունը։ Կորյունի բնագիրը մեզ է հասել հետագա ընդօրինակությամբ։ Հասկանալի է, մինչ այդ երկար դարեր ճամփորդել է գրչական ուղիներով և կարող էր որևէ տեղ վրիպում տալ կամ տարբերություն, ինչպես օրինակ Վռամ IV-ի մականունը՝ Դիսմոն փոխ. Կրման։ Բայց այդ սխալը ցույց է տալիս բնագրի վաղեմությունը։ Ժիշու ձևը գրչի մոտ չի գիտակցվել և նախապես եղել է որ պահպանվել է նրա աղավաղված պատկերը։ Գրեթե բոլոր բանասերները գտնում են, որ բնագրում թագավորների տարիների թվարկման հատվածից՝ թագաւորեալ Կրմանայ Պարսից արքայի ամս վեց և Յազկերտի՝ ամս քսան և մի... տող է ընկած՝ Վռամ V-ի թագավորության ժամանակը։ Զ. Թորոսյանն առաջարկում է վերականգնել այն։ Ն. Ակինյանը Կորյունի քննական բնագրի մեջ ավելացնում է՝ «Եւ Վռամայ ամս ԺԲ», իսկ Մ. Աբեղյանը՝ «Եւ Վռամայ ութ և տասն», Ն. Բյուղանդացին քաղվածք է բերում լրացնելով՝ «Եւ Վռամայ հինգերորդի ամս քսան», Զ. Մանանդյանը նույնպես՝ «Եւ Վռամայ ամս ի», Պ. Անանյանը՝ «Եւ Վռամայ քսան և մի»։ Բնագրին չի միջամտում միայն Գ. Ֆնտզյանը։ Բանասերները կարծում են, որ Կորյունի կողմից Վռամ Կրմանի և Հազկերտ I-ի գահակալության տարիների հիշատակումը Մաշտոցի կրոնավորություն հաշվի մեջ են մտնում. և ամբողջության համար պակասում են Վռամ V-ի տարիները։ Բայց դա այդպես չէ։ Կորյունը գրում է. «Եւ արդ լինի համար ամաց հաւատոց երանելոյն ամբ քառասուն և հինգ և ի դպրութենէն

30 «Հանգես Ամսօրյա»-ի 1983 տարվան 7—12 թիվին մեջ հարդ. բանասեր Մարտիրոս Մինասյան ստորագրած է «Կորյունի գրքի ամս երկուս և վերջարանը» վերնագրով հոդվածը, ուր ետ արձագանք հանդիսանալու հայրենի բանասեր պատմաբան Բաղդատ Ուլուբաբյանի՝ Սովետական Հայաստան ամսագրին մեջ հրատարակած «Հայոց գրքի գյուտի տարեթիվը 393-ին է» հանրամատչելի հոդվածին, ինքն ալ իր կարգին երկու հատվածներ Կորյունի բնագրին դուրս կհանե իրրեկ եկամուտ տարչերս,— գրում է Պ. Անանյանը («Բազմավեպ», 1985, № 1—2, էջ 127)։ Եվ հենց դա է նրան առիթ տվել քննադատությամբ հանգես գալու «հանրամատչելի հոդվածին» դեմ։

31 Կորյուն, էջ 96, 100։

Հայոց մինչև յվախճան սրբոյն՝ ամք երեսուն և հինգ, որք համարին այսպէս: Որք (որոնք), այսինքն՝ կրոնավարութիւնը և գրերի գյուտը՝ դպրութիւնը: Առաջինը համարվում է (հաշվվում է) Վոսա Կրմանի շորորոգ տարուց, երկրորդը՝ Հազկերտ I-ի ութերորդ տարուց, մինչև Մաշտոցի մահը՝ Հազկերտ II-ի առաջին տարին: Վոսա Կրմանի և Հազկերտ I-ի թագավորութիւն տարիները ելակետային են, ելակետային է և Հազկերտ II-ի առաջին տարին, իսկ Վոսա V-ի հետ ոչինչ չի կապված:

Ահա թե ինչու Կորյունը տալիս է Վոսա Կրմանի և Հազկերտ I-ի ժամանակները, ինչպես և՛ Հազկերտ II-ի առաջին տարին, իսկ Վոսա V-ին ողում է: Կորյունի ժամանակագրական վերջարանից տող չի ընկած և որևէ փոփոխություն կամ լրացում անտեղի է:

Այժմ փորձենք տոմարական տեսք տալ Կորյունի ժամանակագրութեանը, ելակետ ունենալով նախապես հայտնի և հավաստի մի տվյալ. Մաշտոցի մահվան թվականը: Մաշտոցը մահացել է 440 թ. փետրվարի 17-ին, Հազկերտ II-ի առաջին տարում, իսկ Հազկերտ II-ի առաջին տարին սկսվում է 439 թ. օգոստոսի 9-ից: Մաշտոցի կրոնավարութեան տարիների հաշիվը 45 է: Մաշտոցի մահից եթե 45 տարի առաջ գնանք կհանգենք 395-ի, որ Վոսա Կրմանի շորորոգ տարին է: Այդպես մենք ստանում ենք և մյուս իշխողների թվերը. Հազկերտ I՝ 397—418, Վոսա Գոռ V՝ 418—439: Իսկ Հազկերտ II-ի առաջին տարին արդեն հայտնի է:

Ստացված արդյունքը փորձենք համադրել պատմագիտութեան մեջ ընդունված արքայացանկի հետ, որ կազմել է Թ. Նյուդեքեն: Այն կստանա այսպիսի տեսք:

Ըստ Կորյունի

Ըստ Նյուդեքենի

Վոսա Կրման IV. 391—397

Վոսա Կրման IV. 388—399

Հազկերտ I. 397—418

Հազկերտ I. 399—420

Վոսա Գոռ V. 418—439

Վոսա Գոռ V. 420—438/9

Հազկերտ II. 439

Հազկերտ II. 438/9—457

Շեղումը բավականաչափ մեծ է սկզբում, իսկ ապա՝ մեկ-երկու տարով: Պարսից արքաների ճիշտ ժամանակագրութեան համար խանգարում է նրանց գահակալութեան հաշվումը շարժական տարվա առաջին ամսից, երբ էլ որ այն տեղի ունեցած լինի: Այդ մասին մենք առիթ ունեցանք խոսելու: Ահա թե ինչու Թ. Նյուդեքեն գահակալների ցանկը տալիս է երկու թվով. իրական և պայմանական: Մինչև VI դար նա ցանկի մեջ իրական թվեր չի նշում: Այդ նշանակում է, որ մինչև VI դար պարսից իշխողների ժամանակագրությունը մոտավոր է: Բացի այդ, հաջորդ գահակալը բարձրանալով իշխանութեան, պաշտոնական տիտղոսներում չի ջնջում նախորդի անունը: Նախորդը նորի հետ դեռ շարունակում է իշխել շուրջ երկու տարի: Դա ժառանգավորման իրավունքն է հավաստում և. անշուշտ, լավ է բարոյական և իրավական տեսակետից, բայց խանոարում է ճիշտ թվագրմանը:

Թ. Նյուդեքեն իր ցանկը կազմել է 1874 թ., հենվելով X դարի արաբ պատմիչ Թաբարիի և այլ միջնադարյան աղբյուրների վրա և բոլորովին ապահով չէ վրիպումից: Կորյունը V դարի պատմիչ է, ժամանակակից, և վարմանալիորեն գրեթե միշտ առաջնություն է տրվում Նյուդեքենի արդյունքներին և ոչ թե աղբյուրին:

Տեսնենք, թե ինչ հարաբերություն կա Կորյունի և Նյուդեքենի ժամանակագրական համակարգերի միջև:

Վոսա Կրմանին Նյուդեքենի ցանկում տրված է տասնմեկ տարի, իսկ Կորյունի մոտ՝ վեց: Բանասերները վեցի փոխարեն առաջարկում են կարդալ տաս և համապատասխանաբար փոխում են մյուս թվերը: Հ. Աճառյանը գտնում է, որ Կորյունը վեցը մտցրել է հավատի տարիների մեջ, իսկ երբ

ասում է, որ Կրմանի շորրորդ տարում սկսվեց Մաշտոցի կրոնավարությունը, ապա ամբողջանում է Կրմանի գահակալության շրջանը՝ տասը:

Բայց դրանով չի վերանում անհամաձայնությունը երկու ցանկերի միջև, քանի որ Թարարին տալիս է 11 և ոչ թե 10, և հետո՝ վեցի և չորսի գումարումն արհեստական է, Կորյունի ժամանակագրակարգի համաձայն Վռամ Կրմանի շորրորդ տարում սկսվել է Մաշտոցի կրոնավարությունը, իսկ Հագկերտի ութերորդ տարում եղել է գրերի գյուտը: Առաջինը տեղի է 45 տարի, երկրորդը՝ 35: Ուրեմն կրոնավարությունից գրերի գյուտ կազմում է 10 տարվա շրջան: Վռամ Կրմանի շորրորդ տարուց 10 տարին հանգում է նույն կետին, ինչ Հագկերտ I-ի ութերորդ տարին: Նշանակում է Վռամ Կրմանն անպատճառ վեց տարի է թագավորել, քանի որ այդ դեպքում միայն նման համապատասխանություն կարող է ստացվել: Դա լավագույն ապացույց է, որ Կորյունը Վռամ Կրմանի թագավորության տարիները գիտի վեց, ինչպիսին էլ այն լինի: Եվ ճիշտ է Կորյունը:

Թարարին մեզ հետաքրքրող հատվածում տալիս է Պարսից թագավորների այսպիսի հաջորդականություն:

Որմիզդ II

Շապուհ II

Արտաշիր II

Շապուհ III

Վռամ IV

Մի փոքր շեղվում է VII դարի հայ Անանուն ժամանակագիրը:

Որմիզդ Շապուհեան

Շապուհ Որմիզդեան

Արտաշիր ի Շապուհեան

Վռամ յԱրտաշրեան³²

Թվարկման ձևից երևում է, որ Անանուն ժամանակագիրը ձեռքի տակ ունեցել է հնագույն պարսկական աղբյուր:

Անանունի ցանկից բաց է թողնված Շապուհ III-ը: Շապուհ III չգիտեն և մեր մյուս հայ պատմիչները՝ Խորենացի, Եղիշե, Ղազար Փարպեցի, որ զալիս է պարսից պատմական ավանդույթից: Դա կարելի է բացատրել:

Շապուհ II երկարակյացը իր տեղական և հռոմեական գործունեությամբ խոր հետք է թողել պատմական հիշողության մեջ և դուրս վանել իր անվանակցին, ավելի ճիշտ՝ ներծուլել իրեն: Շապուհ II-ը, սակայն, ներծուլել է Շապուհ III-ին անվամբ և ոչ՝ ժամանակագրորեն: Նրանց միջև ընկած է Արտաշիր II-ը, որ գահակալել է չորս տարի, ինչպես գիտեն և՛ Թարարին, և՛ Անանունը, և՛ Խորենացին: Արտաշիրը իր տեղում է իր չորս տարիներով, իսկ Շապուհ III-ի ժամանակը մնացել է բաց: Հաջորդը զալիս է Վռամ Կրմանը: Շապուհ III-ը իշխել է հինգ տարի, Վռամ Կրմանը՝ վեց, և ահա Շապուհ III-ի հինգ տարին անցնում է Վռամ Կրմանին և ստացվում է տասնմեկ: Այդպես է առաջացել Վռամ Կրմանի տասնմեկ տարին: Հետագայում Թարարին Շապուհ III-ին վերականգնում է իր տեղում, բայց Կրմանի ժամանակը թողնում է նույնը՝ տասնմեկ տարի:

Այժմ ելակետային երկրորդ թիվը:

Ֆ. Յուստին և Ք. Պատկանյանը Հագկերտ I-ի գահակալության սկիզբը թվագրում են 397, Թ. Նյուդեբենն՝ 399: Նա հենվում է Սելևկիա-Տիգրանի մի ժողովի արձանագրության վրա: Բայց նույնչափ հիմքեր կան ընդունելու, որ Հագկերտ I-ը գահակալել է 397-ին: Հագկերտ I-ին հաջորդել է Վռամ Գոռ V-ը: Բերենք նրա գահակալության առաջին տարվա մասին ժամանակագրական մի տեղեկություն. «Ալեքսանդրի 732 թվականին, որ է Պարսից

³² Անանուն ժամանակագրություն, խմբագիր յորինեալ է զարու ի հնագույն ժամանակագրաց. Վենետիկ, 1904, էջ 30:

Բագավոր Վոսսի երկրորդ տարին, տեղի ունեցավ սուրբ Հակոբի նահատակությունը», — ասված է ս. Յակոբի վարքում³³:

Այլեքսանդրի 732-ր մեր 420-ն է: Սուրբ Հակոբի նահատակությունը տեղի է ունեցել 420 թ., որ Վոսսի Գոռի կամ Վոսսի V-ի երկրորդ տարին է: Նըշանակում է Վոսսի գահակալել է 418 թ.: Կորյունը, Նորենացին, Անանուն ժամանակագիրը, Սեբեոսը, Թաթարին և ուրիշ հայտնի ժողովուրդները Հազկերտ I-ին տալիս են քսանմեկ տարի: Ուրեմն նրա գահակալությունը պետք է ավարտվի 418 թ.: Եվ եթե 418-ից քսանմեկ տարով առաջ գանք, կստացվի 397՝ Հազկերտի առաջին տարին:

Եսկ երրորդ ելակետը՝ Հազկերտ II-ի առաջին տարին մենք արդեն գիտենք՝ 439:

Մնում է արտածել գրերի գյուտի կամ հայոց գիրության ճիշտ ժամանակը:

Հազկերտի ութերորդ տարին անում է 405 (397+8), Մաշտոցի կրոնավորությունից տաս տարի հետո՝ 405 (395+10) և եթե Մաշտոցի մահից 35 տարի առաջ գնանք, դարձյալ հանգում ենք 405-ի (440—35):

Գրերի գյուտի թվականն 405-ն է:

Կորյունի ժամանակագրական վերջարանը ոչ միայն հստակորեն տալիս է գյուտի տարեթիվը, այլև կարևորագույն աղբյուր է, որով հնարավոր է դառնում ուղղումներ մտցնել պարսից գահակալների ժամանակագրական շանկում:

РУДИМЕНТ ОДНОЙ ГИПОТЕЗЫ И ДАТА ИЗОБРЕТЕНИЯ АРМЯНСКОГО АЛФАВИТА

Доктор филол. наук. А. А. МАРТИРОСЯН

Резюме

В 1925 г. Н. Адонц в одной из статей высказал мысль о том, что изобретение армянских письмен произошло не в 400-х годах, а между 383 и 392 годами. Это мнение разделял А. Манандян. Новая гипотеза подверглась серьезной критике. Впоследствии ее авторы пересмотрели свои взгляды. Но в 1981 г. непонятно почему эту гипотезу вновь выдвигает, причем от своего имени, Б. Улубабян. Возрождение отвергнутой гипотезы основано на столь ложных аргументах и заявлениях и так далеко от соблюдения научной добросовестности и этики, что не может стать предметом серьезного обсуждения. Между тем автор уже третий раз выступает на страницах массовой периодической печати, создавая путаницу в этом вопросе. В статье показано, как Б. Улубабян пытается обосновать свой ложный тезис при помощи антинаучных методов.

³³ P. Bedjan. Acta martyrum et sanctorum. T II, Parisus, 1891, p. 539.